

四庫全書

子部

欽定四庫全書

子部

續名醫類案卷五十五  
七

詳校官太醫院吏目<sub>臣</sub>宋桂

編修<sub>臣</sub>倉聖脈覆勘

總校官編修<sub>臣</sub>

王燕緒

校對官中書<sub>臣</sub>

劉源溥

謄錄監生<sub>臣</sub>

陳箴

欽定四庫全書

續名醫類案卷五十五

錢塘魏之琇撰

時毒

此症感四時邪毒之氣其候發於鼻面耳項咽喉赤腫無頭或結核有根寒熱頭痛狀如傷寒

少宰李蒲汀患時毒用發散之藥耗損元氣患處不消  
體倦惡寒食少口乾用益氣湯加桔梗及托裏消毒  
散而愈

秋官陳同野患時毒元氣素弱脉微細而伏此形病俱

虛也用參朮芎歸陳皮柴胡升麻炙草以升舉陽氣  
用牛蒡元參連翹桔梗以解熱毒二劑腫頓消而脉  
亦復矣苟以脉微細為屬陰以腫赤為屬陽而藥之  
鮮有不誤者

一婦人時毒潰後腫赤不消食少體倦膿青色白乃脾  
肺氣虛也先用六君加桔梗芎歸後用益氣湯加桔  
梗而斂

春官表谷虛之妹表散過度腫硬寸脉浮大按之而短

此真氣絕也辭不治後果歿

一男子患此腫痛發熱作渴脉實便秘以五利大黃湯下之諸症悉退以葛根牛蒡子湯四劑而痊

一男子表裏俱解腫痛尚不退以葛根升麻湯二劑而消  
一男子腫痛發寒熱脉浮數以荆防敗毒散二劑少愈  
以人參敗毒散二劑勢減半又二劑而痊

一男子耳面赤腫作痛咽乾發熱脉浮數先以荆防敗毒散二劑勢退大半又以葛根牛蒡子湯四劑而痊

一婦人表邪已解腫尚不消診之脉滑而數乃瘀血欲作膿也以托裏消毒散潰之而愈

一男子焮腫脹痛作渴煩熱便秘脉數按之尤實用防風通聖散一劑諸症頓退以荆防敗毒散加元參牛蒡黃芩二劑而瘥

一老人冬月頭面耳項俱腫痛甚便秘脉實此表裏俱實病也飲防風通聖散不應遂砭患處出黑血仍投前藥即應又以荆防敗毒散而瘳蓋前藥不應者毒血

凝聚上部經絡藥力難達故也惡血既去其藥自效或遽用寒涼藥及年高畏用硝黃而用托裏與夫尋常之劑或不砭泄其毒專假藥力解不危矣

一男子表裏俱解惟腫不消以托裏消毒散四劑膿成針之而愈

一婦人腫痛用硝黃之劑攻之稍緩翌日復痛診之外邪已退此瘀血欲作膿也用托裏消毒散潰之而愈  
一男子頭面腫痛服硝黃敗毒之劑愈甚診之脉浮數

邪在表尚未解用荊防敗毒散二劑勢退大半更以  
葛根牛蒡子湯四劑而痊內經曰身半以上腫天之  
氣也身半以下腫地之氣也乃邪客心肺之間上攻  
頭目而為腫此感四時不正之氣為患與夫膏粱積  
熱之症不同硝黃之劑非大便秘實不可用若不審  
其因不辨其虛實表裏槩用攻之必致有誤常見饑  
饑之際芻蕘之人多患之乃是胃氣有損邪氣從之  
為患不可不察常治邪在表者用葛根牛蒡子湯人



參敗毒散或普濟消毒飲若邪在裏者五利大黃湯  
梔子仁湯表裏俱不解者防風通聖散表裏俱解而  
腫不退者犀角升麻湯如腫甚者砭患處出惡血以  
泄其毒或用通氣散取嚏以泄其毒或用通氣散取  
嚏以泄其毒十日外自愈若嚏出膿血即愈欲其作  
膿者用托裏消毒散欲其收斂者用托裏散此法最  
為穩當五七日咽喉腫閉言語不出頭面不腫食不  
知味者不治

一男子服表散藥愈熾發熱便秘診其脉沉實此邪在裏也。以大黃湯下之。裏症悉退。以葛根牛蒡子湯浮腫亦消。惟赤腫尚存。更以托裏藥潰之。而愈。齊氏云。時毒者為四時邪毒之氣而感之於人也。其候發于鼻面耳項咽喉赤腫無頭。或結核有根。令人增寒發熱。頭痛或肢體痛甚者。恍惚不寧。咽喉閉塞。味者將謂傷寒。便服解藥。一。二日腫氣增益。方悟始求瘍醫。原夫疾古無方論。世俗通為丹瘤。病家惡言時毒。切

恐傳染考之于經曰人身忽經變赤狀如塗丹謂之丹毒此風熱惡毒所為與夫時毒特不同耳蓋時毒初狀如傷寒五七日間乃能殺人治者宜精辨之先診其脉滑數浮洪沉緊弦濇皆其候蓋浮數者邪氣在表也沉濇者邪氣深也氣實之人急服化毒丹以攻之熱實不利大黃湯下之其有表症者解毒升麻湯以發之或年高氣軟者五香連翹湯主之又于鼻內嚙通氣散取十餘左右看病之人每日用嚙藥嚏

之必傳染其病人每日亦用噴藥三五次以泄熱毒  
此治時毒之良法也經三四日不解者不可大下猶  
宜和解之服犀角連翹散之類至七八日大小便不  
通利頭面腫起高赤者可服托裏散黃芪散宜針鑱  
砭割出血泄其毒氣十日外不治自愈也此病若五  
日以前精神昏亂咽喉閉塞語聲不出頭不腫食不  
知味者必死治之無功矣然而此疾有陰有陽有可  
汗有可下常見粗工但云熱毒就用寒殊不知病有

虛實治有逆從不可不審也

徐考功年逾三十耳面焮腫寒熱拘急脉浮洪此時毒症也邪在表以荆防敗毒散加牛蒡元參治之漸愈更以升麻葛根連翹桔梗川芎銀花牛蒡而平復

疔

羅謙甫云丙午歲予居藁城人多患疔瘡縣尹董公謂予曰今歲患疔瘡者極多貧民無力醫治近于史侯處得數方用之者無不效官給藥錢君當捨手治之

遂諾其語董公勝示通衢命予施藥如此一年全活甚衆其用保生錠子千金托裏散神聖膏藥破棺丹凡四方保生錠金脚信二錢雄黃三錢輕粉二錢硃砂三錢麝香錢半巴豆四十九粒蟾酥一錢為細末用黃蠟五錢溶開將藥和成錠子冷水浸少時取出捏作餅子如錢眼大將瘡頭撥開每用一餅次用神聖膏後用托裏散若瘡氣入腹危者服破棺丹

世傳  
疔瘡

必有一條紅線可針紅線所至之處出毒血乃敷藥

神聖膏藥當歸藁本各半

兩乳香沒藥各二錢白芫琥珀各二錢半黃丹二兩  
白膠香三兩黃蠟二兩粉霜一錢木鱉子五十個去  
皮巴豆十五粒去油清油槐柳枝各百廿枝膽礬一  
錢先將槐柳枝下在油內熬焦取出復下餘藥熬勿  
至焦灑出待油澄清下黃丹再熬成膏用緋帛攤之  
立有神効托裏散一兩五錢芪朮芎防各二兩桔芷翹各二兩  
二錢芍桂草參各一兩歸朮香乳香沒藥各半兩細末每  
服三錢酒一大盞煎二三沸和查溫服破棺丹大黃二兩

半生半熟甘草芒硝各一兩細末蜜丸彈子大每服  
半丸食後溫酒化下或童便半盞研化之忌冷水

薛立齋治上林陳靜涵面患疔脉洪數有力屬邪氣蘊  
結用清熱消毒散二劑未應或用黃芪肉桂等藥二  
劑反益其勢致耳目唇口俱腫閉頭面如斗由邪氣  
外實也前脉按之無力由元氣內虛也連進托裏消  
毒之藥及數砭患處出黑血椀許已而膿與腐肉併  
潰而出復用托裏之藥瘡勢漸愈七日後復因調護



失宜以致煩渴不食兩尺脉如絲欲絕急用八味丸料煎服其脉頓復手足自溫使非砭以泄其外托裏散以補其內八味丸以回其陽則治之失宜必致不救慎之慎之

長洲庠蘇子忠鼻梁患之症屬表邪但氣血俱虛不勝發散遂用補中益氣為主佐以防風白芷而愈

張所望治理安寺一僧患水疔走黃絕水穀者已三日衆莫能治延所望入視曰毒已入內奈何須下一針

方可因向瘡頂刺入寸餘始聞痛聲曰生矣隨以膏塗之復投丹藥數粒拔其疔根寸許堅黑如鐵遂愈

錢塘縣志

立齋治一男子足患疔作痒惡心嘔吐時發昏亂脉浮數明炎二十餘壯始痛以奪命丹一服腫起更以荆防敗毒散而愈

一男子患疔發熱煩躁脉實以清涼飲下之而愈

一男子胸患疔遍身麻木脉數而實急針出惡血更明

灸數壯始痛服防風通聖散得利而愈

一男子左手背患之是日一臂麻木次日半體皆然神思昏憤遂明灸至二十餘壯尚不知痛又三十餘壯始不麻至百壯始痛以奪命丹一服腫始起更用神異膏及荆防敗毒散而愈

一老婦足大指患之甚痛令灸之彼不從專服敗毒藥致真氣虛而邪氣愈實竟至不救蓋敗毒散雖能表散瘡毒然而感有表裏所發有輕重體段有上下所

稟有虛實豈可一槩而用之耶且至陰之下藥力所  
難到專假藥力則緩不及事不若灸之為良故下部  
患瘡皆宜隔蒜灸之痛則灸至不痛不痛則灸至痛  
若灸之而不痛者宜明灸之及針疔四畔去惡血以  
奪命丹一粒入瘡頭孔內仍以膏藥貼之若針之不  
痛或無血者以針燒赤頻烙患處以痛為度或不痛  
眼黑如見火光者此毒氣入臟腑也不治若患在手  
足紅絲攻心腹者就于絲盡處刺去惡血宜服荊防

敗毒散若緣近心腹者宜挑破瘡頭去惡水亦以膏藥貼之如麻木者服奪命丹如牙關緊急或喉內患者並宜噲一二丸凡人暴死多是疔毒用燈照看遍身若有小瘡即是宜急灸之俟醒更服敗毒藥或奪命丹人汗入肉食之則生疔瘡不可不慎

劉禹錫纂柳州救三死方云元和十一年得疔瘡凡十四日孟篤善藥傳之皆莫知長樂賈方伯教用蛻娘肉一夕而百苦皆已明年正月食羊肉又大作再用

亦如神效其法一味貼瘡半日許可再易血盡根出  
遂愈蜣螂心腹下度取之其肉稍白是也所以云食  
羊肉又大作者蓋蜣螂食羊肉故耳用時便禁食羊  
肉其法蓋出葛洪肘後方也

本草

韓光治疔極神效正觀初衛州徐使君訪得此方用艾  
蒿一擔燒作灰于竹筒中淋取汁一二合和石灰如  
麵漿以針刺瘡中至痛即點之點三遍其疔自拔亦  
大神驗正觀中用治三十餘人得差故錄之

千金方

繆仲淳治顧博士伯欽內人左耳患疔時方孕令先以  
白藥子末雞子清調塗腹上護胎次以夏枯草甘菊  
貝母忍冬地丁之屬大劑飲之一服痛止疔立拔胎  
亦無恙白藥子療馬病者也

廣筆記

馬銘鞠治顧聖符幼弟患髭疔醫者先用火針圍藥腫  
脹至目與鼻俱隱入肉牙關緊急用患者耳垢齒垢  
刮手足指甲屑和勻如豆大放茶匙內燈火上炙少  
許取作丸令洗淨圍藥將銀簪挑開疔頭抹入外用

綿紙一層津濕覆之痛立止半日腫半消目可開次日服仙方活命飲二劑愈此法兼可治紅絲疔長洲華承溪指節間患之得此而痊又云可治面白疔未

試也此方傳自道人

廣筆記

廣筆記云用陳年露天鐵鏽碾如飛麵將金簪脚挑破毒處一孔納鐵鏽末于內仍將皮蓋好少頃黑水流盡中有白絲如細線慢慢抽盡此疔根也盡即立愈又方用甘菊花并根葉搗汁以酒下之立消



立齋治劉貫卿脚面生疔形雖如粟其毒甚大宜峻利  
之藥攻之因其怯弱以隔蒜灸五十餘壯痒遂止再  
灸片時乃知痛更用膏藥封貼再以人參敗毒散一  
服漸愈夫至陰之下道遠位僻且怯弱之人用峻利  
之藥則藥力未到胃氣先傷虛脫之禍有所不免不  
如灸之為宜

松江諸大尹唇生一疔已五日腫硬脉數煩躁喜冷此  
胃經積熱所致先以涼膈散一服熱去五六更與奪

命丹二粒腫退二三再與荆防敗毒散四劑而愈

楊錦衣唇下生疔脉症俱實而不下反用托裏致口鼻  
流膿而死是謂實實之禍

馬氏室忽惡寒作嘔肩臂麻木手心搔痒遂瞢悶不自  
知其故與卒然暴者不同但手有一泡此乃患疔毒也令急

灸患處至五十餘壯知痛投以荆防敗毒散而愈古  
人謂暴死多是疔毒急用燈照遍身若有小瘡即是  
此毒宜急灸其瘡但是胸腹溫者可灸先君云有人

因剥死牛脊悶令看遍身俱有紫泡便急灸泡處良久遂甦更以敗毒藥而愈

張都憲夫人面生疔腫焮痛甚數日不潰脉症俱實以荆防敗毒散加芩連治之稍愈彼以為緩乃服托裏一劑其勢愈甚痛極始悟再用涼膈散二劑痛減腫潰又與連翹消毒散十餘劑而愈

鄭氏舉家生疔多在四肢由皆食死牛肉所致刺去黑血更以紫金丹服之悉愈

王檢討汝和感痘毒面生疔十餘枚腫痛脉數以荆防  
敗毒散治之雖小愈尚可畏更以奪命丹一服而痊  
陸宣子山東名醫也言京師李公子某指甲中生肉管  
赤色頃刻長三尺餘垂至地能動動則血眯欲死諸  
醫束手公子乃取酒痛飲引刀自斷之出血數斗良  
久復生如初自分死矣有乞兒自言能治召之肩火  
蛇至顧罵諸醫者曰公子蛇頭疔也其管通四肢百  
骸絕則又出若輩何能為蓋乞兒初饒于財嘗患此

破家求醫不可得遇一丐命其妻納大蛇袴中穴袴  
出蛇首握之與肉管相向蛇以氣吸之不移時而消  
蛇則紅絲百道僵死矣乃如其法治之公子亦愈竟

分其產之半與乞兒云

蔣湘帆

疣

附癭

周漢卿治山陰楊翁項有疣如瓜大醉仆階下潰血不  
能止疣潰者必死漢卿以藥糝其穴血即止

明史

薛立齋治長洲庠王夫爵辛丑春左腿近環跳穴患瘤

狀如大桃按之濡軟恪服除濕流氣化痰之劑惡寒發熱食少體倦形氣俱虛脉洪大而虛氣瘤也肺主之蓋肝屬木肺屬金然發于膽經部分乃肺金侮肝木元氣虧損而其膿已內潰矣遂用十全大補湯數劑出青白稀膿甚多頓加寒熱煩渴頭痛殊類傷寒狀此因膿泄而血氣益虛耳仍用前湯其勢益甚脉洪數大按之如無乃加附子一錢其勢愈甚而脉復如前此虛甚而藥不能及也更加附子二錢三劑諸

症頓退乃朝用補中益氣湯夕用十全大補湯各三十餘劑出腐骨五塊瘡口將完後因不慎起居患處復潰諸症更發咽間如焚口舌無皮用十全大補加附子一錢服之諸症即愈二日不服內病悉至患處復潰二年後又患服前藥不應診其尺脉微細如絲此屬命門火衰用八味丸為主佐以十全大補湯稍愈至乙巳仍患虛寒之症而歿

一男子左腿外側近臀腫一塊上有赤縷三年矣飲食

起居如常觸破涌出血膿發熱惡寒此膽經受症故發于腿外側診其脉左尺洪數左關弦洪此腎水能生肝木用補中益氣湯六味地黄丸而痊

一老嫗右腋下生一瘤漸長至尺許其狀如長瓠子久而潰爛一方士以長柄鮮葫蘆燒存性研末搽之水出消盡而愈

繫瘤法芫花淨洗帶溫不得犯鐵器於木石器中搗取汁用線一條浸半日或一宿以綫繫瘤經宿即落如



未落再換綫不過兩次自落後以龍骨并訶子末敷  
瘡口即合依上法繫妳痔累用得效繫瘤法蘇耽良  
方有用蜘蛛絲者然費力不如此徑捷如無根只用  
花泡濃水浸綫亦得趙氏家姊嘗用繫腰間一瘤不  
半日即落亦不痛

百乙方

琇按芫花用之繫疣即落雄猛可知虫門中孫文  
垣嘗用三分以治某氏婦立下其癥苟非實積未  
可輕試

孫真人治癭一二年者以萬州黃藥子半斤須緊實者  
若虛而輕即他處產者用一斤取無灰酒一斗浸固  
浸器口以糖火燒一伏時停待酒冷卻開令患者日  
飲之不令酒氣絕經三五日後以綫圍頸覺消即停  
飲否則令項細也用火時不可多惟燒酒氣出瓶頭  
有津即止火不待經宿也已驗如神忌毒食

黃履素曰予年三十時臂生一小瘤根細如綫而頭如  
豆大越十年漸大如荔有妨跨馬予有鑒于決瘤之

說不敢醫常歎曰吾年若六七十此瘤當如椀大必妨行坐矣奈何既而歎曰六七十即礙行坐亦何妨遂安意養之及四十七歲時偶擦傷瘤皮水滲出不止懼其成漏乃延潘惠峯問之云欲去此瘤甚易欲塞此漏甚難瘤去則漏自止矣不得已聽其治潘以藥塗瘤甚痛其肉盡黑少頃血出津津予甚懼且悔不復求治但求止血之藥越宿則黑肉已堅如石片數日脫去其根尚存如豆水出仍不止復商之潘潘

曰不去其根漏仍不可塞也又以前藥點之痛甚肉黑如初次日復點凡三次內服托裏散每劑用黃耆五錢凡旬日堅肉脫去則根已平仍服托裏散外用長肌收口藥絕慾息勞以漸收滿肌肉完好予之服藥守禁固勤且慎者而潘君亦可謂妙手矣

張子和在西華衆人皆訕以為吐瀉一日魏壽之與張入食肆中見一夫病一瘤正當目之上網內眥色如灰李下垂覆目之睛不能視物乃謂壽之曰吾不待

食熟立取此瘤魏未之信也語其人其人曰人皆不敢割曰吾非用刀割別有一術焉其人從之乃引入一小室中令俛卧一牀以繩束其脰刺乳中大出血先令以手揉其目瘤上亦刺出雀糞立平壽之大驚張曰人之有技可盡窺乎

一女子未嫁年十八兩手背皆有瘤一類雞距一類角丸腕不能伸向明望之如桃膠然夫家欲棄之張見之曰在手背為膠瘤在面者為粉瘤此膠瘤也以鉗

針十字刺破按出黃膠三兩匙立平更不再作非素明者不敢用此法

一婦人年四十餘有癭三辨張令以鹹吐之三涌三汗三下癭已半消次服化癭之藥遂大消去夫病在上皆宜吐亦自有消息之法耳

張景岳三旬外忽臀下肛門前骨際皮裏生一小粒初如棗豆許不以為意及半年大如黃豆又一年如棗核復如栗矣乘馬坐榻皆有所礙且漸痛料此非數

藥可散又非煎藥可及若漸長大如升如斗懸挂腰  
股間行動不便將奈何謀之識者皆云不可割刺恐  
為害初亦未敢然熟思此時尚小不取則日久愈大  
愈難矣遂決意去之乃飲酒乘醉以柳葉針刺之所  
出如豆腐白皮之類蓋粉瘤也刺後頓消兩日後則  
腫如熟癰以會通膏貼三日膿潰而愈不兩日又腫  
起更熱更大始悔其刺之誤再以會通膏貼之又三  
日而大潰潰出一囊如魚脬者然後收口全愈使開

之再遲則難瘳矣

一人眼皮下弦生一小瘤初如米粒漸大如豆外科用攢針三四枚翻轉眼皮刺其內膜少少出血如此二次其瘤日縮竟得盡消

一人臂上生一瘤漸大如龍眼其人用小艾於瘤上灸七壯竟爾漸消亦善法也或用隔蒜灸之亦無不可一人腹上生一瘤大如胡桃治者以蛛絲撚成粗線扎其根數日其絲漸緊瘤根漸細屢易屢細不十日竟



脫落誠竒法也可見他線日鬆唯蛛絲日緊物理之  
妙有當知者如此然纏之亦宜早若形勢既大恐不

宜也

方出焦氏筆乘  
舊案已裁其畧

沈樞文幼嚙指甲及長不能自禁此肝火血燥也又頸  
側常生小疣子屢散屢發又臂生一塊如菘豆大若觸碎  
則如斷束縷扯之則長縱之則縮後兩鬢發白點求治  
曰子素肝病此部亦屬肝膽經也夫爪為筋之餘但  
行人身之側正與嚙爪生疥等症相應須滋補腎水

以生肝膽則諸病自愈與六味地黃丸服之二年白  
點自退疣亦不生

一男子小腹中一塊不時攻痛或用行氣化痰等藥不  
應猶以為血蠶服行氣逐血之劑後手背結一痲子  
漸長寸許形如蠶狀肢體間如豆大者甚多彼疑蠶  
生子今發于外亦用行血虛症悉至左尺洪數關脉  
洪數而弦謂腎水不能生肝木以致肝火血燥而筋  
攣用六味丸滋水生肝三月而愈

陶氏佃民有病瘰者嘗與陶僕輸穀如市道遠勞極瘰  
櫻其頸氣幾不接陶僕素愚勿遽問削竹為銳鈿刺  
之瘰穿氣溢頸復完固荷擔而起一無所苦

說願

余兄奇峯生兩瘤大如拳僧傳一方用竹刺將瘤頂上  
稍稍撥開油皮勿令見血細研銅綠少許放于撥開  
處以膏藥貼之數日即潰出粉而愈

續金陵  
瑣事

錢國賓治山西神池張百長姪女年十七自八歲左手  
背生瘤日大已如鍾許看係粉瘤可治與一方用已

豆天麻子肉各四兩大杏仁一兩香油一斤二兩血丹八兩熬膏藥貼之一日一換其皮漸薄旬日皮紅半月皮破出膿椀許癰消口平說之右衛酬謝

辛酉夏廣陵各鹽場天行時疫人多濕熱病若傷寒頭疼發熱不惡寒身體痛舌紅昏睡不食思涼飲肌黃大便結小便紅醫用發散清涼劑罔效錢亦臨症治復不投病勢數日如故前後胸背漸長數十瘤如核桃大其皮甚薄以針挑破每瘤出虱數千遍抓四處

人人寒禁莫敢近視瘤破虱出調服後人做此俱愈  
氣頸之症乃人項下墜如長瘤也山東多有此症雖風  
水所致亦卧熱炕過食辛辣而然他方間有此根由  
足厥陰肝經之脉循喉嚨之後上入頰顙屬肝統于  
足陽明胃經此盖起于肝胃二經瘤長挂下雖非致  
命大不美觀古今並無治法錢訪海上仙方遇異人  
傳授用青皮六錢疏肝桔梗六錢引導木饅頭一名  
鬼饅頭煨存性二兩消瘻散肝胃二經結氣共末酒

下一錢凡氣頸小者三四月消大者七八月或一年  
消其功雖緩其方百發百中即錢已治蘭溪王元直  
衮州趙瑚璉二人矣不惜良方普利後世

會稽黃元亮文士也年五旬頸生氣瘤候其六脉衝旺  
榮衛俱足精神元氣亦厚止肝部沉滯氣結成瘤錢  
告之曰公無病人也氣瘤結于頸下不過不美觀耳  
終無大害書云凡粉瘤痰瘤虫瘤石瘤腿瘤虱瘤發  
疽瘤可治凡氣瘤筋瘤肉瘤肩瘤癭瘤血瘤肋瘤乳

瘤肘臂瘤不可治治之破膜泄氣不救宜絕此念勿  
信庸愚以輕性命也黃拜謝而去

結核

薛立齋治一婦人經事不調肢體結核如榛如豆不計  
其數隱於肉裏其色不變三年餘矣大按則痛或投  
以降火消毒乃不按自痛發熱作渴日晡益甚經水  
過期左關脉數此肝火血燥也用清肝益榮湯六十  
餘劑諸症已愈惟項核未消又以當歸龍薈丸數服

及八珍湯加柴胡山梔三十餘劑而痊

一婦人久鬱怒胸脇內股外臑各結核寒熱往來經候  
不調胸膈不利飲食少思大便不調左關弦洪右寸  
弦數右關弦緊曰左關弦洪肝經熱也左寸弦數木  
生火也右關弦緊肝尅脾也右寸弦浮木侮金也法  
當生肝血遂用加味四物湯而諸症退用加味道遙  
散而經候調用加味歸脾湯而全愈

一婦人因怒肢體結核唾中發搐左關弦洪此肝火血



燥筋攣當清肝火養元氣遂用加味小柴胡湯加味  
逍遙散漸愈又用八珍湯加丹皮柴胡山梔鈎藤而愈  
一婦人肢體結核胸腹痞悶氣泄稍寬此肝脾鬱滯不  
信服降火行氣化痰病愈甚而氣愈虛用加味逍遙  
加味歸脾二藥間服半載而痊

一婦人項間結核不時寒熱左目緊小頭項振掉四肢  
抽搐此肝火血虛風熱也用加味逍遙加鈎藤數劑  
諸症漸愈又用八珍湯調理而痊

一婦人耳內耳後項側結核作痛寒熱口苦月經不調  
此肝膽經火而傷脾胃也用四君柴胡丹皮及六味  
丸而愈

一婦人因怒桔核經行不止發熱晝安靜而夜譫語此  
血分有熱也用小柴胡加生地頓安其核尚在經後  
先期肝脉弦數此肝火血涸而筋攣也用加味道遙  
加生地月經如期而核消

一婦人項臂結核頭痛寒熱乳內時疼兩脇焮痛此肝

脾鬱火而血燥先以加味逍遙散再用加味歸脾湯而愈

一婦人素鬱怒患結核內熱晡熱久而不愈若面色痿黃則月經過期而少若面色赤則月經先期而多曰面黃過期脾經虛弱也面赤先期脾虛火動也朝用補中益氣升舉脾土以益氣血夕用加味逍遙滋養肝血以息陰火復以歸脾湯解鬱結半載元氣復而痊又有患前症因脾虛下陷而發熱乃專治其瘡變瘵而歿

一女子耳下結核焮痛寒熱此屬肝經風熱用梔子清肝散一劑諸症悉愈後因怒耳後并額兩角作痛寒熱此兼少陽經症仍以前藥加羌活二劑而瘥

一婦人項患五核時常寒熱肝肺弦長而出寸口此血盛無耦之症也用小柴胡湯加生地烏梅治之而愈

施二守項右患一核用涼藥貼頸皆腫又敷之腫

連胸脇冷應腹內不悟涼藥所致尚以為毒盛形  
體困憊自分不起見其敷藥處熱氣如霧急令去藥  
良久瘡色變赤刺出膿血用托裏藥而愈

舉人江節夫兩耳下兩臂兩肋結核恪服祛痰降火軟  
堅之劑益甚薛曰此膽經血虛火燥也蓋膽經行人  
身之側前藥必致虧損至明年七月復請視各核皆  
潰脉浮大而濇時金旺于秋木受金刻必不治果卒  
周上舍兩耳下項間筋牽壅腫堅硬咳嗽氣喘內熱盜

汗所服皆化痰散堅行氣之劑勢益甚診之左關弦  
瀋左尺洪數此怒氣傷肝房勞損腎須滋腎水生肝  
血慎調攝至水旺之際庶可愈矣彼欲速効乃外敷  
商陸石灰等藥內服海藻蓬朮之類至秋金旺之際  
元氣愈虛腫甚而歿

一上舍性豪善怒耳下結一核忽潰而瘡口翻張如菌  
煖連頭痛或胸脇作脹或內熱寒熱或用清熱消毒  
之藥年餘未瘥用補中益氣湯六味地黃丸而尋

愈瘡口翻出亦  
名翻花瘡

邵黃門子手合骨處患一核半年後潰一小孔如粟又  
年餘不合日出清膿數滴或止三四滴面上赤脉數  
口乾夜則發熱晝則惡寒行履如故此氣血俱虛也  
辭不治月餘後他處相會彼云小兒有不藥之功矣  
薛曰過火令方為善也已而果斃

繆仲淳治一女子頰下發一硬塊而不痛有以石瘻用  
貝母首烏各三錢連翹白芨花粉各二錢牛蒡蒼耳

青木香各錢半銀花鮮菊地丁各五錢先用夏枯草  
五兩河水五椀煎三椀去渣納前藥煎至一椀服十

劑全消

廣筆記

薛立齋治一男子神勞多怒頸腫一塊久而不消諸藥  
不應以八珍湯加柴胡香附每日更隔蒜灸數壯及  
日飲遠志酒二三盞而漸消

續名醫類案卷五十五



欽定四庫全書

續名醫類案卷五十六

錢塘魏之琇撰

瘰癧

薛立齋治一男子患瘰癧腫痛發寒熱大便秘以射干  
連翹散六帖熱退大半以仙方活命飲四帖而消  
一男子腫硬不作膿脉弦而數以小柴胡湯兼神効瓜  
萸散各數劑及隔蒜灸數次月餘而消

一婦人頸腫不消與神效瓜萸散六劑少退更以小柴胡湯加青皮枳殼貝母數劑消大半再以四物對小柴胡數劑而平

一男子因怒項下腫痛結核痞悶兼發熱用方脉流氣二帖胸膈利以荆防敗毒散二帖而熱退肝脉尚弦瀉以小柴胡加芎歸白芍四劑脉症頓退以散腫潰堅丸一料將平惟一核不消乃服遇仙無比丸二兩而痊

一婦人久鬱患而不潰既潰不斂發熱口乾月水短少  
飲食無味日晡尤倦以益氣養榮湯二十餘帖少健  
謂須服百帖庶保無虞彼欲求速效反服斑貓之劑  
及數用追蝕毒藥去而復結致不能收斂出水不止  
遂不救此症屬虛勞氣鬱所致宜補形氣調經脉未  
成者自消已成自潰若投慄悍之劑則氣血愈虛多  
變為瘵症然堅而不潰潰而不合氣血不足明矣况  
二經之血原自不足不可不察

一男子久而不斂神思困倦脉虛欲投以托裏彼以為迂乃服散腫潰堅湯半月餘果發熱飲食愈少復求治投益氣養榮湯三月喜其謹守得以收救齊氏云

結核癰癰初覺宜內消之如經久不除氣血漸衰肌寒肉冷或膿汁清稀毒氣不出瘡口不合聚腫不赤結核無膿外症不明者並宜托裏膿未成者使膿早成已潰者使新肉早生血氣虛者托裏補之陰陽不和托裏調之大抵托裏之法使瘡無變壞之症所

以宜用也

一男子久不斂膿出更清面黃羸瘦每清晨作瀉與二神丸數服瀉止更以六君子湯加芎歸月餘肌體漸復灸以豆豉餅及用補劑作膏藥貼之三月餘而愈

一婦人潰後核不腐以益氣養榮湯三十餘劑更敷針頭散腐之再與前湯三十餘劑而斂

一男子未潰倦怠發熱以補中益氣湯治之少愈以益氣養榮湯月餘而潰又一月而痊

一婦人肝經積熱患而作痛脉沉數以麝干連翹湯四帖少愈更用散腫潰堅九月餘而消丹溪云癰癧必起于足少陽一經不守禁忌延及足陽明經食味之厚鬱氣之久曰毒曰風曰熱皆此二端拓引變換須分虛實實者易治虛者可慮此經主決斷有相火且氣多血少婦人見此若月水不調寒熱變生稍久轉為潮熱自非斷慾食淡神醫不能療也

一室女年十七項下時或作痛乍寒乍熱如瘧狀肝脉

弦長此血盛之症也先以小柴胡湯二劑少愈更以  
生地黄丸治之而痊婦人良方云寡婦之病自古未  
有言者惟倉公傳與褚澄畧為論及言寡者孟子所  
謂無夫曰寡是也如師尼喪夫之婦獨陰無陽欲男  
子而不可得是以鬱悒而成病也易曰天地氤氳萬  
物化醇男女媾精萬物化生孤陽獨陰可乎夫處閨  
門慾心萌而不遂致陰陽交爭乍寒乍熱有類瘧疾  
久而為癆又有經閉白淫痰逆頭風膈氣痞悶面黧

瘦瘠等症皆寡婦之病診其脉獨肝脉弦出寸口而上魚際究其病原其疾皆血盛而得經云男子精盛則思室女人血盛則懷胎觀其精血思過半矣

一男子耳下患五核如貫珠年許尚硬面色痿黃飲食不甘勞而發熱脉數軟而瀉以益氣養榮湯六十餘劑元氣已復患處已消一核尚存以必効散二服而平

一男子因勞而患怠惰發熱脉洪大按之無力謂須服補中益氣湯彼不信乃服攻伐之劑吐瀉不食而死大



抵此症原屬虛損若不審虛實而犯病禁經禁鮮有  
不誤常治先以調經解鬱更以隔蒜灸之多自消如  
不消即以琥珀膏貼之俟有膿即針之否則變生他  
處設若兼痰兼陰虛等症只宜加兼症之劑不可干  
擾餘經若氣血已復而核不消却服散堅之劑至月  
許不應氣血亦不覺損方進必效散或遇仙無比丸  
其毒一下即止二藥更服益氣養榮湯數劑以調理  
若瘡口不斂宜用豆豉餅灸之用琥珀膏貼之氣血

俱虛或不慎飲食起居七情者俱不治此症以氣血為主氣血壯實不用進蝕之劑亦自腐但取去便易收斂若氣血虛不先用補劑而數用追蝕之藥適足取敗耳

一男子素弱潰後肉不腐此氣血皆虛用托裏養榮湯氣血將復核尚在以簪挑撥去又服前藥月餘而愈一男子氣血已復核尚不腐用針頭散及必效散各三次不旬日而愈

一男子患之盛胸膈痞悶脾胃脉弦此脾土虛肝木乘之也當以實脾土伐肝木為主彼以治痰為先乃服苦寒化痰藥不應又加以破氣藥病愈甚始用六君子湯加芎歸數劑飲食少思以補中益氣湯倍加白朮月餘中氣少健又以益氣養榮湯兩月腫消而血氣亦復矣夫右關脉弦弦屬木乃木盛而尅脾土為賊邪也虛而用苦寒之劑是虛虛也况痰之為病其因不一主治之法不同凡治痰利藥過多則脾氣愈

虛則痰愈易生如中氣不足必用參朮之類為主佐以痰藥

一婦人因怒項腫後月經不通四肢浮腫小便如淋此血分症也先以椒仁丸數服經行腫消更以六君子湯加柴胡枳殼數劑項腫亦消矣亦有先因小便不利後身發腫致經水不通名曰血分宜葶藶丸治之婦人良方云婦人腫滿若先因經水斷絕後至四肢浮腫小便不通名曰血分水化為血血不通則復化

為水矣宜服椒仁丸若先因小便不利後身浮腫致  
經水不通名曰水分宜服葶蔞丸

一室女年十九頸腫一塊硬而色不變肌肉日削筋攣  
急痛此七情所傷氣血所損之症也當先滋養血氣  
不信乃服風藥後果不起盧砥鏡曰經云神傷于思  
慮則肉脫意傷于憂愁則肢飛魂傷于悲哀則筋攣  
魄傷于喜樂則皮槁志傷于盛怒則腰脊難以俛仰  
也何侍郎有女適人夫早逝女患十指攣拳垂莫能

舉膚體瘡瘍粟粟然湯劑雜進飲食頓減幾于牛載  
適與診之則非風也正乃憂愁悲哀所致耳病屬內  
因藥仍以鹿角膠輩多用麝香熬膏貼瘻處學能舉  
指能伸病漸安

一癆婦四肢倦怠類痿症以養氣血健脾胃藥而愈

一室女性急好怒耳下常腫痛發寒熱肝脉弦急投以  
小柴胡湯加青皮牛蒡荆防而寒熱退更以小柴胡  
對四物數劑而腫消其父欲除去病根勿令再發謂

肝內主藏血外主榮筋若恚怒氣逆則傷肝肝主筋故筋搐結而腫須病者自能調攝庶可免患否則肝迭受傷則不能藏血血虛則為難瘥之症矣後不戒果結三核屢用追蝕藥而歿

一少婦耳患腫素勤苦發熱口乾月水每過期而至且少一老媪以為經閉用水蛭之類通之以致愈虛而歿夫月水之為物乃半太陽半少陰二經主之此二經相為表裏主上為乳汁下為月水為經絡之餘氣苟

外無六淫所侵內無七情所傷脾胃之氣壯則衝任  
之氣盛故為月水適時而至若面色痿黃四肢消瘦  
發熱口乾月水過期且少乃陰血不足也非有餘熱  
之症宜以滋養血氣之劑徐而培之則經氣盛而經  
水自依時而下

一放出宮女年逾三十兩胯作痛不腫色不變大小便  
作痛如淋登廁尤痛此瘀血漬入隧道為患乃男女  
失合之症也難治後潰不斂又患癰瘡而歿此婦為



湯氏妾湯為商常在外可見此婦在內久懷幽鬱及  
在外又不能如願是以致生此疾愈見流注瘰癧乃  
七情氣血皆已損傷不可用攻伐之劑皎然矣故精  
血篇云精未通而御女以通其精則五體有不滿之  
處異日有難收之疾陰已痿而思色以降其精則精  
不出而內敗小便道塞而為淋精已耗而復竭之則  
大小便道寧疼愈疼則愈欲便愈便則愈疼女人天  
癸既至逾十年無男子合則不調未逾十年思男子

合亦不調不調則舊血不出新血誤行或漬而入骨  
或變而為腫或雖合而難子合男子多則澀枯虛人  
產乳衆則血枯殺人觀其精血思過半矣

一室女年十七患瘰癧久不愈月水尚未通發熱咳嗽  
飲食少思有老媪欲用巴豆肉桂之類先通其經謂  
此症潮熱經候不調者不治但喜脉不濇且不潮熱  
尚可治須養氣血益津液其經自行彼惑于速效之  
說仍用之薛曰非其治也此類乃慄悍之劑大助陽

火陰血得之則妄行脾胃得之則愈虛經果通而不  
止飲食愈少更加潮熱遂致不救經云女子七歲腎  
氣盛齒更髮長二七天癸至任脉通太衝脉盛月事  
以時下然過期而不至是為失常必有所因夫人之  
生以血氣為本人之病未有不先傷氣血者婦女得  
之多患于七情寇宗奭曰世有室女童男積想在心  
思慮過當多致勞損男子則神色先喪女子則月水  
先閉何以致然蓋憂愁思慮則傷心心傷則血逆竭

血逆竭則神色先散而月水先閉也火既受病不能榮養其子故不嗜食脾既虛則金氣虧故發嗽嗽既作水氣絕故四肢乾木氣不充故多怒鬢髮焦筋骨痿俟五臟傳遍故卒不能死者然終死矣此一種于勞中最難治蓋病起于五臟之中無有已期藥力不可及也若或自能改易心志用藥扶持如此則可得九死一生舉此為例其餘諸方可按脉與症而治之一男子先于耳前下患之將愈次年延及項側缺盆三

年遂延胸腋不愈診之肝脉弦數以龍薈散堅二丸  
治之將愈肝脉尚數四年後小腹陰囊內股皆患毒  
年餘不斂脉診如前以清肝養血及前丸而愈

薛云一富商項有瘰癧一片頗大云因怒而致困苦二  
年百法不應忽方士與藥一服即退二三再服頓退  
四服而平以重禮求之乃必效散又一媪治此乃用  
中品錠子經瘡內以膏藥貼之其根自腐未盡再用  
更搽生肌藥數日即愈又一道人治此用雞子七個

每個入斑猫一枚飯上蒸熟每日空心食一枚求者甚多各書療癰門及本草亦云合前二法觀之惟氣血不虛者有驗虛者恐不能治也

療癰

凡患此赤脉貫瞳子有幾條則幾年死無則可治

薛立齋治一癰婦面黃體倦酸嘔氣此中氣虛弱欲用補中益氣湯加茯苓半夏不信反降火利氣胸膈痞滿癰瘡腫痛又散堅利氣噯氣不絕大便不實四肢時冷曰今變中氣虛寒矣用六君子湯加薑桂少

用升麻柴胡漸愈更佐以補中湯全愈

一婦人患此噯氣用降火清胃食少吞酸胸膈痞悶用利氣消導吐痰氣促飲食日少用清熱化痰大便堅瀆內熱身瘦曰吞酸噯氣脾胃氣虛也胸痞痰喘脾肺氣虛也大便堅瀆內熱日瘦脾肺血虛也遂以補中益氣加炒黑吳茱萸三分數劑佐以六味丸諸症頓退乃用歸脾湯逍遙散間服而愈

一男子患瘰癧腫硬久不消亦不作膿服散堅敗毒藥不

應令灸肩尖肘尖二穴更服益氣養榮湯月餘而愈  
一婦人瘰癧久潰發熱月經每過期且少用逍遙蕪前  
湯兩月餘氣血復而瘡亦愈但一口不收敷針頭散  
灸前穴而瘡常治二三年不愈者連灸三次兼用托  
裏藥必愈

田氏婦年逾三十瘰癧已潰不愈與八珍湯加柴胡地  
骨皮夏枯草香附貝母五十餘劑形氣漸轉更與必  
效散二服瘡口遂合惟氣血未平再與前藥三十餘



劑而愈後田生執此方不問虛實槩以治人殊不知散中斑猶性毒雖瘰癧多服則損元氣若氣血實者此下之而投補劑或可愈或虛而用下藥或用追蝕藥瘀肉雖去而瘡口不合反致難治

一儒者癩愈後體瘦發熱晝夜無定此由三陰氣血俱虛用八珍加麥冬五味二十餘劑又用補中益氣湯加麥冬五味及六味丸而愈

儒者張子容素善怒患此久而不愈瘡出鮮血左關弦

洪重按如無此肝火動而血妄行症屬氣血俱虛用  
補中益氣湯以補脾肺六味丸以滋腎而愈

陸子溫兩耳下腫硬用伐肝軟堅之劑益甚其脉左關  
弦緊左尺洪數此腎水虧損而筋攣也當生肺金滋  
腎水則肝得血而筋自舒矣彼不悟仍服前藥竟致  
不起

楊乘六治俞某患瘰癧左右大小十餘枚俱堅硬如石  
頭項腫大不能轉側吐血咳嗽夢遺半年皆服滋陰

降火固精伐肝之劑脉之弦勁中兼見躁動左關尺  
獨緊細如刀口舌青嫩而胖滑知其肝膽用事肝膽  
先病延及心脾其痰嗽不絕者肝氣虛逆痰隨氣上  
也其夢泄不止者肝血虧損踈泄失職也其瘰癧腫  
大肝火鬱結不舒也乃以養榮湯倍肉桂月餘已有  
痊意更以前方佐歸脾養心二方消息守服三月而愈  
周漢卿治錢唐王氏女生瘰癧環頭及腋凡十九竅竅  
破白瀝出將死矣漢卿為剔竅母深二寸其餘烙以

火

灸之也

數日結痂愈

明史

張子治一婦人病瘰癧延及胸臆皆成大瘡相連無好皮肉張曰火淫所勝治以醎寒命以滄鹽吐之一吐而著痂再用涼膈散解毒湯等劑皮肉乃復如初

灸瘰癧以手仰置肩上微舉肘取肘骨尖上是穴隨所患處左即灸左右即灸右艾炷如小筋頭許三壯即愈復作即再灸如前不過三次永絕根本先倅湯壽資宰鍾離有一小鬟病瘡已破傳此法于本州一漕

官早灸晚間膿水已乾凡兩灸遂無恙後屢以治人  
人皆驗駱安之妻患四五年瘡痂如田螺靨不退辰  
時著艾申後即落所感頗深凡三作三灸遂除根矣  
立齋治一男子素嗜慾且勞神惡熱喜冷仲冬始衣綿  
乃患癰脉洪大無力曰此陰氣耗散陽無所附陽  
氣浮散于外而惡熱也敗毒散加苓連山梔四劑少  
愈再以四物湯加苓連白芷桔梗甘草金銀花數劑  
而消

繆仲淳治朱文學鏡患瘰為炙肩井肘尖兩穴各數壯

而愈

廣筆記

薛立齋治一婦人患瘰癧延至胸臆腋膿水淋漓日久  
五心煩熱肢體疼痛頭目昏重心忪頰赤口乾咽燥  
發熱盜汗食少嗜卧月水不調臍腹作疼謂非瘡故  
乃血虛而然也服逍遙散月餘少可更服八珍湯加  
丹皮香附又月餘而經通再加黃芪白朮兩月餘而愈  
沈氏室患瘰癧久而不消自汗惡寒此氣血俱虛也遂

以十全大補湯月餘而潰然堅核雖消而瘡口不斂  
更灸以豆豉餅仍與前藥加烏藥香附兩月而愈大  
抵堅而不潰潰而不合皆由氣不足也嘗見患此者  
瘡口雖合而不加補往往變為瘰癧

一婦人因怒耳下腫痛以荆防敗毒散加連翹黃芩四  
貼而愈嘗治此旬日不消者以益氣血藥及飲遠志  
酒遠志一味末之酒一盞調澄清飲之以其腫自消  
查先宜泔浸數患處治女人乳疔尤效

若無膿者亦自潰不戒忿怒者難治

一婦人亦因怒耳下焮腫頭痛寒熱與荆防敗毒散加黃芩治表症悉退但飲食少思日晡發熱東垣云雖有虛熱不可太攻熱去則寒生也遂以小柴胡湯加地骨皮川芎當歸茯苓白朮陳皮十餘劑而愈次年春復腫堅不潰來索方與八珍湯加香附柴胡地骨皮桔梗自製服之至六七劑以為延緩仍服人參敗毒散勢愈甚又服流氣飲則盜汗發熱口乾少食至秋復求治診視氣血虛極辭不治果歿今人有瘡瘍



不審元氣虛實病在表裏便服敗毒流氣藥殊不知  
敗毒散乃發表之劑果有表症亦只宜一二服多則  
元氣反損其毒愈甚雖有人參莫補流氣飲乃耗血  
之劑果氣結膈滿亦只宜二三服多則血氣愈傷反  
為敗症雖有芎歸莫救丹溪云此不因膏梁丹毒之  
變因虛勞氣鬱所致也

一婦人患瘰癧不消膿清不斂以八珍湯治之少愈忽  
肩背痛不能回顧此膀胱經氣鬱所致當以防風通

氣湯治之蓋膀胱之脉始于目内眦上頂巔下耳角復上巔至腦後過風府下項走肩膊一支下腰脊是經氣動則脊痛項強腰似折按此非膀胱經症而何彼乃云瘰癧但經病也其脉主行項側即是經火動而然遂自服清肝降火之藥反致不食痛盛復求治診其脉胃氣愈弱先以四君子湯加陳皮炒芍半夏羌活蔓荊子四劑食進痛止繼以防風通氣湯二劑而愈又一婦流注潰久忽發熱乃虛也與補藥二劑

不用另用人參敗毒散大熱而斃夫老弱之人雖有風邪亦宜以補中益氣湯治之况又非表症而峻表不死何俟

一男子因怒耳下及缺盆患癰潰延腋下形氣頗實瘡口不合以散腫潰堅丸治之而愈一婦患此氣血不弱亦服此丸其核並消而瘡口不斂更以十全大補湯及灸以豆豉餅始痊

江中翰姪年及二十耳下患癰焮痛左關脉數此肝經

風熱所致以荆防敗毒散三帖表症悉退再與散腫潰堅九月餘而平復

一婦人年二十耳下結核經水每過期午後頭痛服頭風藥愈甚以八珍湯加柴胡地骨皮二十餘劑而愈

流注

薛立齋治一婦人因暴怒而腰腫一塊或胸膈不利或走氣作痛此營氣鬱滯與方脉流氣飲數劑而止更以小柴胡對四物加香附貝母月餘而愈

一婦人患流注遇勞必痛衆手按之痛乃止屬氣血俱  
虛用十全大補湯六味丸逍遙散而痊

一婦人先肢體作痛後患流注發熱惡寒食少脇脹月  
經不調痰喘咳嗽五心煩熱健忘驚悸盜汗無寐悉  
屬肝脾虧損氣血不足用十全大補加味歸脾兼服  
諸症悉痊

一婦人素頭暈患流注月經遲少此屬中氣虛弱用補  
中益氣湯而愈後因勞仆地月經如涌此勞傷火動

用前湯加五味子一劑而愈

一婦人患前症用行氣化痰等藥胸膈不利飲食少思  
用疎利之藥大便作泄中滿不食此脾胃復傷用補  
中益氣湯加炮薑脾胃健飲食進又用六君子加芎  
歸百餘劑始全愈

一婦人素鬱結肩臂各腫如覆杯此肝脾虧損用加味  
逍遙散多于補氣藥右手脉不足者補氣藥當多于補  
血藥切不可發表

一男子腿患腫肉色不變不痛脉浮而滑以補中益氣湯加半夏茯苓枳殼木香飲之以香附餅熨之彼謂氣無補法乃服方脉流氣飲愈虛復求治以六君子湯加芎歸數劑飲食稍進再用補劑月餘而消夫氣無補法俗論也以其為病痞悶壅塞似難于補殊不知正氣虛而不能運行則邪氣滯而為病經云壯者氣行則愈弱者則著而為病苟不用補法氣何由而

行乎

經語在流注門尤為肯綮

一婦人潰後發熱以為虛彼不信仍服敗毒藥乃大發熱竟至不救夫潰瘍雖有表症發熱宜以托裏藥為主佐以表散之劑何況瘰癧流注乎若氣血充實經絡通暢決無患者此症之因皆由氣血素虧或七情所傷經絡鬱結或膝理不密六淫外侵墜道壅塞若不審其所因辨其虛實鮮不誤人

一男子腿患久而不斂飲大補藥及附子餅更用針頭散經之而愈



一男子患臂年餘尚硬飲食少思朝寒暮熱以八珍湯加柴胡地骨皮丹皮月餘寒熱少止繼以益氣養榮湯及附子餅灸之兩月餘膿成針之更服人參養榮湯半載而痊

一婦人膿潰清稀脉弱惡寒久而不愈服內塞散灸以附子餅而痊

一婦人腰間患一小塊肉色如常不潰發熱謂當以益氣養榮解鬱之藥治之不信別服流氣飲後針破出

水年餘而歿

一婦人久不斂忽發寒熱決其氣血俱虛彼反服表散之劑果大熱亦死大抵流注之症多因鬱結或暴怒或脾氣虛濕氣逆于肉理或腠理不密寒邪客于經絡或閃撲或產後瘀血流注關節或傷寒餘邪未盡為患皆因真氣不足邪得以乘之常治鬱者開之怒者平之閃撲及產後瘀血者散之脾虛及腠理不密者除而補之傷寒餘邪者調而解之大要以固元氣

為主佐以見症之藥如久而瘡口寒者更用豆豉餅  
或附子餅炙之有膿管或瘀肉者用針頭散腐之自  
愈錠子尤效若不補血氣及不慎飲食起居七情俱  
不治

一男子元氣素弱將欲患此胸膈不利飲食少思欲治  
以健脾胃解鬱結養氣血彼不從乃服辛香流氣之  
劑致腹脹又服三稜蓬朮厚朴之類飲食愈少四肢  
微腫兼腰腫一塊不潰而歿蓋此症本虛痞今用尅

伐之劑何以不死况辛香燥熱之劑但能劫滯氣取快于一時若不佐制過服益增鬱火煎熬氣液為痰日久不散愈成流注之症

一聘士流注久潰肌肉消瘦發熱作渴惡寒少食以六君子加歸芪附子服數劑患處遂紅活又服十全大補三十餘劑膿漸稠而愈後惑于人言謂盛夏不宜用附子彼又因場屋不遂意復患前症專服敗毒流氣之劑元氣消爍肌肉日瘦醫以為不治自分不起

其師滕洗馬云向者病危得附子藥而起今藥不應以致危篤何不仍服附子藥遂復求治其脉微細症屬虛寒並無邪毒仍用附子藥乃得愈

賈閣老子患流注脉數作渴極喜飲冷膿水清稀面帶赤色曰此氣血虛而蕪火也治難奏功彼以為迂別服燥濕分利之劑兩月餘反加煩渴寒熱往來復邀治形體已脫曰雖治亦無功矣後果不起

陳進士遂初年逾三十患腹腫硬逾年而瘡頭破時出

血水此七情所傷榮氣絕于肉理而然名曰流注診  
之肝脉瀋蓋肝病脉不宜瀋小腹正屬肝經須瀋脉  
退乃可愈欲以甘溫之劑補其氣血令自消潰不信  
仍服攻伐之藥致氣血愈虛果歿于金旺之月丹溪  
云諸經惟少陽厥陰之生癰疽宜預防之以其多氣  
少血也少血而肌肉難長瘡久不合必成敗症苟不  
知此輒用峻利毒藥以伐其陰分之血則其禍不旋  
踵矣

一室女背胛結一塊如鈔大而不可燉但倦怠少食日晡發熱脉軟而澹此虛勞氣鬱所致也用益氣養血開鬱之藥又令飲人乳精神稍健彼不深信又服流氣飲飲食遂少四肢痿軟乃悔之復求治以為決不可起矣後果斃

一男子年三十餘素饑寒患右肋腫如覆瓢轉側作水聲脉數經曰陰虛陽氣湊襲寒化為熱熱甚則肉腐為膿即此症也及按其腫處即起是膿已成矣遂以

濃煎黃耆六一湯

著六

一令先飲二鍾然後針之膿出

數椀諸虛症並至遂以大補藥治之三月餘而愈大抵膿血大泄氣血必虛當峻補之雖有他病皆宜緩治蓋元氣一復諸病自退若老弱之人不同腫潰尤當補也

一男子年十九腰間腫一塊無頭色不變三月不潰飲食少思肌肉日瘦此寒搏腠理滯氣不行鬱而為腫也名曰濕毒流注百餘劑元氣復而腫消後因勞役怒



氣經行不止服涼血之劑其血如崩此因脾氣復傷下陷而血從之朝用補中益氣湯夕用歸脾湯而愈

一婦人稟弱性躁脇臂腫痛胸膈痞悶服流氣敗毒藥反發熱以四七湯數劑胸寬氣利以小柴胡湯對四物加陳皮香附腫痛亦退大抵婦人性執著不能寬解多被七情所傷遂致遍身作痛或肢節腫痛或氣填胸滿或如梅核塞喉嚅吐不出或痰涎涌盛上氣喘急或嘔逆惡心甚者渴悶欲絕產婦多有此症宜

服四七湯先調滯氣更以養血之藥若因憂思致小便白濁者用此湯吞青州白丸子屢效

一婦人腿患筋攣骨痛諸藥不應脉遲緊用大防風湯二劑頓退又二劑而安又一婦人亦然先用前湯二劑更服黑丸子而痊此二患若失治必潰成敗症

一老人傷寒表邪未盡股內患腫發熱以人參敗毒散二劑熱止矣以香附餅又小柴胡加二陳羌活川芎歸身白朮枳殼數劑而散

一男子肩胛患之微腫形勞氣弱以益氣養榮湯服黑  
丸子及木香生地作餅覆患處熨之月餘膿成針之  
仍服前藥而愈

一男子臂腫筋攣骨痛年餘方潰不斂診其脉更虛以  
內室散一料少愈以十全大補湯及附子餅灸之而  
痊精要云留積經久極陰生陽寒化為熱以此潰多  
成痿宜早服內塞散排之

一男子腿患潰而不斂用人參養榮湯及附子餅更以

補劑煎膏貼之兩月而愈

通府李廷儀患流注唾痰氣促自恃知醫用化痰理氣  
等劑半載而潰用托裏等劑膿水淋漓腫硬不消寒  
熱往來飲食少思肌肉消瘦大便不實手足時冷兩  
尺脈浮大按之微細曰此屬命門火衰當用八味丸  
不信乃服參芪歸朮之類更加痰喘泄瀉服八味丸  
益氣血年餘而瘥

一婦人背患流注內潰脹滿服流氣化痰之劑自汗盜

汗脉大兩弱此元氣虧損之症也與參芪各一兩歸  
朮各五錢肉桂二錢服而針之至夜半始出稀膿二  
椀許翌日大汗倦甚煩熱手脚自動氣促脉洪大而  
數仍用前藥加附子一錢炙草二錢二劑脉症悉退  
又以六君加薑桂二十餘劑始離牀褥後因勞復寒  
熱作渴汗出時仲冬寢幃氣出如霧用十全大補加  
桂附二劑而痊

一學士年十六患此二載矣脉洪大而數膿清熱渴食

少體倦夜間盜汗午前畏寒曰真氣不足邪氣有餘  
治之無功矣午前以四君子加芎歸炙草午後以四  
君子加五味麥冬參芪兩月諸症遂可一二又有用  
滲利之劑保其必生者三月後形體骨立後竟不救  
一弱人患流注內潰出敗膿五六椀是時口眼歪斜以  
獨參湯加附子二錢二劑少愈更以十全大補之劑  
月餘而痊大抵瘡瘍膿血既泄當大補氣血為先雖  
有他症當以未治之凡癰大潰發惡寒皆屬氣血虛

甚若左手脉不足者補血藥當元戎云若人飲食踈  
精神氣血弱肌肉消薄榮衛之氣短促而瀋滯故寒  
搏腠理閉鬱而為癰腫當補之以接虛怯之氣遂以  
十全大補加香附陳皮三十餘劑始針之出白膿二  
椀仍用前藥倍參芪及以豆豉餅炙之漸愈彼欲速  
効內服敗毒外貼寒涼反致食少膿稀色紫喜得精  
氣未喪仍以前藥加遠志貝母白斂百劑而愈

劉文通室年逾二十腰間突腫寸許肉色不變微痛不

潰發熱脉大此七情所傷氣血凝滯于隧道而然也  
當益氣血開鬱結更以香附餅熨之使氣血充暢內  
自消散不消雖潰亦無虞不聽乃服十宣流氣藥氣  
血愈虛破出清膿不斂而斃

續名醫類案卷五十六



欽定四庫全書

續名醫類案卷五十七

錢塘魏之琇撰

膿疥

蘇頌曰黥人治疥癬遍體諸藥不效者生取白花蛇截斷以磚燒紅沃醋令氣蒸置蛇于上以盆覆一夜如此三次去骨取肉芘以五味令爛頓食之瞑睡一晝夜乃醒瘡疔隨皮便退其疾便愈

本草綱目

張子和曰貨生藥焦百善云有堯夫來買苦參欲治疥  
不識藥性緩急但聞人言可治濃煎一椀服之須臾  
大吐涎一盆三二日疥作痂矣

潘頊曰予蔓孫患膿疥三年身無完膚下體尤甚內治  
外治百無一效乃自製一方名和中固氣湯以蒼朮  
一錢燥濕白朮一錢固脾黃芪一錢實腠理升麻八  
分柴胡一錢引清氣元參八分散上焦火苓連各七  
分清中焦火黃柏七分伏下焦火歸身一錢養心血

甘草陳皮人參各五分調中氣煎服存查加白蒺藜

金銀花煎洗十數劑全愈

褚記室

姚應鳳診一人遍體發小疥如粟應鳳曰是名淨海瘡

不治生治死其人不信治之死

錢塘縣志

元希聲侍郎治卒發疥秘驗方石灰隨多少和醋漿水

調塗隨手即滅一法用石灰炒紅出火氣香油調敷

薛立齋治稽勳李龍岡患疥腿足為甚日晡益焮口乾

作渴小便頻赤此腎經虛熱用補中益氣湯六味丸

而痊

一儒者善嘔患疥以為內有濕熱腠理不密外邪所搏也與補中益氣湯加白芷川芎治之不從自服荆防敗毒散痛處發腫小便赤澹此肺腎陰虛用補中益氣湯加五味麥冬而愈

一儒者患疥誤用攻伐之劑元氣虛而不能愈用補中益氣湯加茯苓其瘡頓愈又因調養失宜日哺益甚用八珍湯加五味麥冬五十餘劑而愈

一男子患疥色黯作痒出黑血日晡益甚其腿日腫夜消以為氣血虛而有熱朝用補中益氣夕用加味道遙而愈

一男子時疫愈後所患如前用前藥補養而愈有同患用砭法出血而死此因陰虛血熱色黑作痒也何乃反傷陰血哉

一婦人疥久不愈食少體倦此肝脾虧損而虛熱先用補中益氣湯加川芎炒梔元氣漸復更以逍遙散而

愈若復問譫語此熱入血分用小柴胡湯加生地治之血虛者四物合小柴胡湯熱退却用逍遙散以補脾胃生陰血或有寒熱如瘧亦治以前藥

一婦人患疥作痒膿水不止脉浮無力以消風散四劑少愈更以四生丸月餘而平

一男子痒少痛多無膿水以芩連荆防山卮薄荷白芍歸梢治之而愈

一男子焮痛發熱脉浮數以人參敗毒散四劑少愈更

以當歸飲服數劑而愈

一男子焮痛寒熱便秘脉數有力以防風通聖散二劑

少愈更以荆防敗毒散加黃芩山卮四劑而愈

一婦人作痒午後尤甚以當歸飲服數劑少愈更以人

參荆芥散數劑而安

一男子久不愈搔起白屑耳作蟬聲以四生散

白附子  
黃芪獨

活羨  
蒸數服痒止更以當歸飲服數劑而痊

一男子下體處多焮痛日晡尤甚腿腕筋紫而脹脉洪

大此血熱而然也就于紫處刺去瘀血以四物湯加  
芩連地骨丹皮柴胡四劑而安患在上體若臂腕筋  
紫脹亦宜刺去其血以前湯加柴胡黃芩即愈

一男子搔痒成瘡日晡痛甚以四物加芩連荆防數劑  
而止更以四物加蒺藜首烏黃芪二十劑而愈

智化寺一僧患瘡疥自用雄黃艾葉等藥燃于被中熏  
之翌日遍身焮腫皮破水出飲食不入投以解藥不  
應而死蓋藥毒熏入腹內而散真氣其禍如此



丁丑予舉家生瘡家人亦用此方重之瘡不愈未  
幾鑿兒出痘症極凶藥不能下咽而歿迨亦受其  
毒耳

一男子患瘡疥搔破出膿水面赤作渴大便堅實脉洪  
數左關寸為甚此木火相搏也先用瀉青丸料煎服  
熱勢頓減又用梔子柴胡散加味逍遙散而瘡愈  
一儒者遍身生瘡癢膿水淋漓自知醫服八珍荆防  
之類益甚脉洪大按之無力謂此氣血虛熱也用八

珍湯加丹皮治之而愈繼娶後兩足生瘡久不愈尺  
脉數而無力用地黃丸八珍湯而痊

一男子時疫愈後遍身發癩作痒服補中益氣湯而愈  
因人言不信乃用砭法出血而死此因陰虛血熱色  
黑作痒也何乃反傷陰血哉

一男子患癩乾痒作痛以苓連荆防山梔薄荷白芍歸  
梢治之而愈

蔣仲芳治一僧初患疥自以水銀蘄艾熏之遂喘息胸

滿遍身浮腫或投五皮飲而不效投椒目大黃等喘  
腫愈甚曰氣道皮膚肺氣熱也復以火熏火毒傷肺  
遂失降下之令氣道塞水道閉喘息溺瀦浮腫之所  
由來也今復推蕩陰血又傷若非童真難免于死矣  
以麥冬黃芩山梔桑皮花粉滑石木通燈草與之四

劑而愈

薛案有一僧亦  
用重法致死

胡氏子年二十餘生膿窠已一年服藥無算長卧牀席  
二三日間昏暈數次其室穢氣盈溢膿血痛苦仰卧

不能轉側兩手皆瘡不能診候問其飲食惡心否云  
尚可飲食曰胃氣在可生也即以黃芪白朮當歸甘  
草廣膠為主佐以銀花浮沒煎之以酒六劑瘡愈大  
半二十劑而全愈

姚氏婦有子而自乳肥瘡如桃背及下半身俱滿異痛  
異痒膿血淋漓已經三月不時寒熱漸作惡心蔣曰  
病急矣但喜其日未久因乳子而血氣驟虛因多卧  
而飲食不運也亦以前方加黃柏連翹陳皮香附外

以大黄朴硝松香東丹為末少加飛鹽麻油調敷亦  
不久而愈此二人者胡子清熱消運之品俱為日久  
虛弱者設也若初起壯實者粒如小粟而多痒曰疥  
瘡風熱為勝理以苦參黃柏荆芥防風為君膿泡如  
痘而多痛曰膿窠濕熱居多理宜蒼朮秦艽銀花連  
翹為主俱加天麥門冬酒炒黃芩以清肺蓋肺主皮  
毛肺熱則皮毛有是疾也若日久則肺虛又宜補肺  
而不宜清肺矣此意先哲未及故附之

癬

張子和治一女子年十五兩股間濕癬長三四寸下至膝發痒時爬搔湯火俱不解痒定黃赤水又痛不可耐炙熇熏溲硫黃藺如僵蠶羊蹄跟之藥皆不效其父母來求療張曰能從予言則瘥父母諾之以鉞針磨尖快當其痒處于癬上各刺百餘針其血出盡煎鹽湯洗之如此四次大病方除此方不盡以告後人恐為癬藥所誤濕淫于血不可不砭者矣

薛立齋治一人生風癱似癱三年不愈五心頻熱脉洪  
按之則濡此血虛之症也當以生血為主風藥佐之  
若專攻風毒則血愈虛而熱愈熾血被煎熬則發癩  
癰或為怯症遂以逍遙散數劑及人參荊芥散二十  
餘劑而愈

劉禹錫傳信方云予少年曾患癰初在頸項間後延上  
左耳遂成濕瘡浸淫用斑蝥狗膽挑根諸藥徒令蝨  
蝨其瘡轉盛偶于楚州賣藥人教用蘆薈一兩研甘

草炙半兩相和令勻先以溫漿水洗癬乃用舊乾帛

子拭乾便以二味合和傅立乾差神效

本草

立齋治一男子面青腿內臙患癬類色赤作痒或為砭  
刺出血發熱焮痛服消風散而益甚服遇仙丹愈加  
發熱作渴仍服之膿水淋漓其脉洪數左關為甚此  
肝經血虛火內動復傷其血而瘡甚先用柴胡清肝  
散數劑又用四物山梔治之諸症漸退用八珍湯地  
黃丸兩月餘而痊



張子和治一童子病滿胸腹濕癬每爬搔則黃水出已  
年餘先以末作丸上涌次以舟車丸瀆川散下三五  
行次服涼膈加朴硝少許時時呷之不數日而愈

### 疣瘡

翟立之素善飲遍身疣瘡搔起白屑上體為甚面目焮  
腫成瘡結痂承漿潰膿眼赤出淚左關脉洪數有力  
或作癘風治之膿潰淋漓此肝火濕毒以四物湯加  
乾薑連翹山梔柴胡一劑諸症悉退四劑全退兩睛

各顯青白翳一片亦屬肝火再剷翳去乃用六味丸而愈

一儒者身發疣瘡時起赤暈憎寒發熱服癘風之藥眉落筋攣後疣瘡漸潰日晡熱甚肝脉強洪餘脉數而無力此肝經血虛風熱也先以小柴胡合四物湯加丹皮酒炒黑知柏肝脉漸和晡熱漸退又用八珍湯加丹皮酒炒黑知再與加味逍遙散加參朮鈎藤服兩月瘡悉愈而眉漸生後因怒復作用小柴胡湯加

芎歸鉤藤木賊而愈後勞役發熱誤用寒劑不時身  
痒日晡赤暈早與補中益氣湯加五味麥冬山藥午  
後與加減八味丸尋愈後食燒炙等物仍發疙瘩小  
便白濁後關脉滑大有力用補中益氣湯加山巵諸  
症悉退

一男子秋間發疙瘩兩月餘漸高有赤暈月餘出黑血  
此風熱血虛所致先用九味羌活湯風熱將愈再用  
補中益氣湯而愈後不慎房慾復作盜汗晡熱口乾

唾痰體倦懶言用補中益氣湯加減八味丸頓愈

一婦人遍身疣瘡搔痒敷追毒之藥成瘡出水寒熱脇痛小便不利月經不調服祛風之劑形體消瘦飲食少思此肝火血燥生風也前藥益傷肝血先用歸脾湯二十餘劑又用加味道遙散二十餘劑蓋諸症漸愈乃用六味地黄丸調理而瘡此等症候服風藥而死者多矣

一男子不時患疣瘡搔痒成瘡膿水淋漓惡寒發熱先

用羌活當歸散而痒止又用易老祛風丸而不發後  
飲燒酒起赤暈二便不通口舌生瘡熱渴不安用防  
風通聖散二便通利但口乾體倦飲食不入用七味  
白朮散去木香四劑而愈

一男子遍身患疙瘩作痒勞而益甚用參芪歸朮為君  
佐以柴胡炒芩桔梗川芎炙草而痊更用補中益氣  
之劑後不再發

一男子患疙瘩痒發熱形氣虛弱口鼻氣熱且喜飲冷

屬外邪也以消風散二劑外邪悉解但倦怠少食更以參芪陳皮炙草五味而健又以補中益氣湯去柴胡升麻加茯苓白芍乃痊

一男子患疣瘡多在臀脚勞役則痒甚小便色黃服敗毒散苓連之劑患處痒痛夜不得寐此脾氣下陷用補中益氣湯加五味麥冬少用炒黑黃柏治之而痊凡病日間如故日晡倦怠成勞愈加晨起如故皆元氣虛也宜用前藥補而治之

一男子患疣瘡色黯作痒出黑血日晡至夜益甚其腿  
日腫夜消以為氣血虛而有熱朝用補中益氣湯夕  
用加味逍遙散而愈

一儒者應試後遍身瘙痒後成疣瘡此勞元氣陰火內  
熾秋寒収斂腠理鬱熱內作補中益氣湯加茯苓川  
芎白芷而愈後復勞仍作惑于人言服祛風敗毒藥  
如大風之狀又發熱作渴倦怠懶食用補中益氣湯  
倍參芪歸朮半夏茯苓五味麥冬而愈

一婦人遍身患疣瘡發熱作痒內服敗毒祛風外搽攻  
毒追蝕各潰成瘡膿水津淫形氣消瘦飲食日減惡  
寒發熱作渴飲冷脉浮數按之則澹此元氣復傷也  
先用七味白朮散數劑其渴漸止飲食稍加乃用八  
珍湯加柴胡丹皮膿水漸乾又用六君芎歸丹皮山  
梔瘡漸收斂仍用八珍山梔丹皮而愈

一婦人因怒寒熱發赤暈服祛風之劑發疣瘡或砭出  
血患處焮腫發熱頭痛內服外敷俱係風藥膿水淋



滴服花蛇酒之類前症益甚更加晡熱煩渴不寐脉  
洪大按之如無此血脫煩燥先用補血當歸湯稍緩  
用四君當歸數劑得睡但倦怠頭暈少食用補中益  
氣湯加蔓荊子稍可又用八珍湯加用芎芎倍用參  
朮三十餘劑而能步履又復月餘而痊

一婦人性急善怒月經不調內熱口苦患疣瘡作痒服  
敗毒之藥膿水淋漓熱渴頭眩日晡益甚用加味逍  
遙散漸愈後因大怒月經如涌眼出淚用四物湯加

山梔柴胡連芩數劑而愈年餘左足脣腕起白點漸  
大搔起白屑內熱盜汗月經兩月餘一至每怒或惡  
寒頭痛或不食作嘔或胸乳作脹或腹內作痛或小  
便見血或小水不利或白帶下注此皆肝木制伏脾  
土元氣虛而變症也用補中益氣湯加炒黑山梔及  
加味歸脾湯服半年而愈後每怒惱患赤暈或以風  
疾治之發疣瘡又服遇仙丹赤腫作痒出膿水外敷  
追蝕之藥寒熱作渴又服胡麻草烏之藥遍身瘙痒

眉毛脫落膿水淋漓咳嗽發熱月經兩月一行用四  
君當歸丹皮月餘熱渴稍止飲食少進又服月餘咳  
嗽少可却用八珍湯加丹皮二十餘劑患處漸乾經  
水如期後因傷食作瀉不食用六君子湯飲食漸進  
又因怒發熱作渴患處作痛經行不止用加味道遙  
散漸可仍用四君子湯而痊愈

一女子二十歲月經先期或過期或怒則身發赤暈或  
患疣瘡六七日方退服祛風藥癢作渴撥破成瘡

膿水浸淫曰此肝火生風再服是藥必致筋攣不悟  
後兩手固攣始信先用地黃丸四物湯月餘熱渴頓  
減乃佐以加味逍遙散又月餘患處膿少又用四君  
山梔丹皮二十餘劑指能伸屈因怒發熱經水不止睡  
中筋脉抽動不安以加味逍遙散加鉤藤治之而痊  
仍用四物山梔鉤藤丹皮而瘡結靨乃去鉤藤調理  
元氣復而瘡靨乾

一女子常患癩疹作痒因怒發熱變為疔瘡痛甚用梔

子清肝散治之而愈後又觸怒痕起赤暈遊走不定  
自砭出紫血甚痒徹骨其熱如炙如大麻風欲用風  
藥治之曰然乃以當歸補血湯四劑其熱悉止又用  
聖愈湯加味逍遙散而痊

一婦人身發疙瘩或如丹毒痒痛不常搔碎成瘡膿水  
淋漓發熱煩渴頭目眩暈日晡益甚此血虛內熱之  
症以當歸飲加柴胡山梔治之愈

一婦人患前症肢體疼痛頭目不清自汗盜汗月水不

調肚腹作痛食少倦怠先用人參荊芥散後用逍遙散治之而痊

一婦人因忿怒身發疙瘡憎寒發熱此肝火用小柴胡湯加山梔黃連治之而愈後口苦脇痛小便淋漓復用前藥遂全愈

一婦人患前症發熱夜間譫語此血分有熱以小柴胡湯加生地治之而安後用四物湯加柴胡山梔丹皮而熱退又用逍遙散全愈

一女子常患疥瘡時或作痒服消風之類搔破成瘡其痒不止延及頭面先用羌活當歸散其痒頓止用加味逍遙散其熱頓痊又用當歸飲而瘡亦愈用八珍柴胡山梔而不再作

### 血風癩疹

薛立齋治一男子面赤作渴面常患小瘡作痒服祛風藥遍身發赤癩服花蛇酒更發赤暈遍行砭刺又服消風散發熱口渴飲水不止謂肝經血虛而風熱也

用梔子清肝散及地黃丸料煎服熱渴漸止瘡漸結  
靨用八珍湯地黃丸瘡靨漸脫又服月餘瘡漸愈

一男子面生粉刺或生小瘤服消風散瘡益甚服遇仙  
丹加遍身赤痒仍服前藥發熱炊腫又服旬餘潰而  
出水形體骨立先用四君子當歸桔梗四劑飲食稍  
進又用八珍湯數劑而痊

一男子嗜膏粱炙煇醇酒辛辣之物遍身生痞瘤甚痒  
服消風散之類更起赤暈又砭出血其痒益甚敷敗



毒之劑遂各成瘡膿水津淫眉毛漸脫赤痒益甚此  
脾經積熱傷血所致先用犀角地黄湯諸症稍退乃  
用濟生犀角地黄湯加黃連治之膿水漸止乃以八  
珍湯加山梔丹皮眉毛漸生因飲食失宜胸腹作脹  
飲食少思或大便下血用五味異攻散加升麻飲食  
漸進又用補中益氣湯而血止仍用異攻散加當歸  
丹皮而痊

一女子性急多怒月經先期患痞癩色赤作痒搔破膿

水不止服祛風藥其瘡益甚服花蛇酒四肢癱瘓眉  
毛脫落先用柴胡清肝散加鉤藤數劑又用加味道  
遠散加鉤藤諸症漸愈又用易老祛風丸而安

一女子年十四腕軟處生物如黃豆大半在肉中紅紫  
色痛甚諸藥不效一方士以水銀四兩白紙二張揉

熟蘆銀擦之三日自落而愈

李樓  
怪症

朱丹溪治朱院君三十餘久患癩疹身痺而紫色可與  
防風通聖散加牛蒡為極細末每二錢水盞半入薑

汁令辣煎食前熱飲之

汪石山治一人年逾六十形瘦蒼紫夜常身痒搔之熱  
蒸皮肉磊如豆粒痒止熱散肉磊亦消醫用烏藥順  
氣升麻和氣等不效診之脉皆細濡近駛曰此血虛  
血熱也而為順氣和血所謂誅罰無辜治非所宜遂  
以生地元參白蒺藜歸芍芪芍黃芩甘草陳皮煎服  
月餘而愈

一老人患疹色微赤作痒發熱以人參敗毒散二劑少

愈以補中益氣湯加黃芩山梔而愈

一婦人遍身搔痒秋冬則劇脉浮數此風邪客于皮膚而然也名曰血風癩飲以消風散及搽蛇牀子散少可更以四物湯加荆防數劑而愈一婦患此夏月尤甚脉洪大以何首烏散一婦患赤斑瘙痒搔破成瘡出水久而不愈內服當歸飲外搽蛇牀子散並愈又一婦患此諸藥不應以四生散數服而愈大抵婦人體虛風邪客于皮膚則成白癩寒濕客于肌肉鬱熱

而為赤癩色雖有異治法頗同凡人汗出不可露卧  
及浴經云汗出見濕乃生瘰癧雷公云遍身風癩皆  
由汗身受風也

瘙痒

薛立齋治一男子遍身瘙痒後成瘡出水洒浙惡寒皮  
膚皴起眉毛漸落大便秘結小便赤少此屬肺火為  
患用補氣瀉滯湯四劑諸症漸退但倦怠惡寒小便  
清少此邪氣去而真氣虛用補中益氣湯兼換肌散

半載元氣復而諸症退時仲秋忽大便不實小便頻數體倦食少洒淅體重此濕邪乘虛而作用東垣益胃湯二劑頓安仍用前藥調理三月餘全愈

一男子兩目俱赤遍身痒痛搔起白皮此肝肺陰虛誤服祛風燥劑鼻赤面紫身發疣瘡搔出血水用升麻湯下瀉青丸數服又用加味逍遙散數劑身鼻漸白疣瘡漸消又用四物湯加參芪柴胡山梔并換肌散各百餘服喜其年少謹疾全愈

一婦人日晡身痒内外用追毒祛風之劑膿水淋漓午  
前畏寒午後發熱殊類癘風用補中益氣湯加山梔  
鉤藤又以加味逍遙散加川芎而愈

一婦人手心赤癢痒發熱頭暈作渴晡甚服祛風清熱  
之藥膚見赤痕月經過期用加味逍遙散倍熟地熱  
止痒退更以四物湯加柴胡參芪炙草茯苓頭清渴  
止再用四物湯加參朮茯苓山梔赤暈亦消

一男子患癩痒破而成瘡如大麻風服遇仙丹發熱作

渴大便秘結脉沉實右關為甚此熱畜于内也先用  
黃連内疎湯而大便通利又用防風通聖散去硝黃  
而熱渴止却用八珍湯而瘡愈

一男子脾腎氣血虛熱後遍搔痒時喜熱水浴之後患瘡  
癩破而出水用風藥益甚或赤或白眼作花痒先用  
胡麻散六味丸而痊次年兩股小腹頸項復作痒用  
四生散六味丸而愈

一婦人經水先期勞役或氣惱則寒熱瘙痒服祛風降



火等藥不勞怒而自痒發熱更加痰喘氣促服化痰清氣  
之藥形氣倦怠食少胸痞身發瘡疥服消毒之類膿水淋  
滴服大麻風藥口乾作渴欲水而不敢飲經水又過期眉  
間若動又復月餘眉毛脫落經水淋漓此心肝二經風熱  
相搏制金不能平木木剋脾土而不能統血肝火旺而不  
能藏血也經云水生木遂朝用地黃丸以滋腎水生肝血  
夕用加味逍遙散以清肝火生肝血月餘諸症漸愈又佐以  
四君芎歸丹皮月餘經水旬日而止又兩月餘經水五十

餘日而至乃夕用五味異攻散加當歸服兩月經水四十餘日而至因怒寒熱經水如崩眉稜角動脉洪數弦肝脾二脈為甚用柴胡梔子散二劑以平肝火用五味異攻散二劑以補脾氣發熱頓退經水頓止更以八珍湯倍加參朮及地黃丸兩月餘經水如期眉毛漸生因飲食停滯腹脹作痛另服祛逐劑泄瀉不止小便重墜飲食甚少先用六君子湯送四神丸數劑瀉漸止飲食少進又用補中益氣湯倍用升麻數劑重墜漸愈

後因勞心發熱飲食難化嘔吐涎水其熱自臍上起  
覺饑熱頻作乃用六君子湯加炮薑治之熱時飲稠  
米湯稍安兩月餘又常服加味歸脾補中益氣二湯  
而痊

一婦人秋間肢體作痒時發寒熱日晡熱甚口苦喜酸  
月水先期面色常青熱甚則赤恪服清熱涼血後發  
疔瘡赤痒益甚乃清熱敗毒破而膿水淋漓謂此肝  
脾血燥虛不信仍治瘡毒其瘡益甚形氣倦怠飲食

減少先用補中益氣湯間佐以六君當歸元氣稍復  
乃以八珍湯倍用參朮少用川芎白芍間佐以補中  
益氣湯諸症漸愈又以四君子湯佐以加味逍遙散  
兩月餘膿水漸少又復月餘瘡漸結靨因怒寒熱腹  
脹飲食少思患處復甚用六君子湯加山梔柴胡乃  
用四君子湯為主而瘡漸愈又因怒月經甚多發熱  
作渴瘡痛出血用柴胡清肝散熱退痛止仍用四君  
子湯而結靨又用八珍山梔丹皮而愈

一婦人遍身瘙痒膿水淋漓發熱身如虫行月經不調  
先用升麻湯送瀉一丸熱痒頓退又用加味逍遙散  
經行如期用換肌丸而瘡愈後因怒經行不止筋骨  
作痛用秦艽地黄湯易老祛風丸而愈

一婦人性沉静懷抱不樂月經過期遍身作痒服祛風  
清火之劑搔破成瘡出水不止其痒益甚或用消風  
散之類眉稜跳動眉毛折落又服遇仙丹患處俱潰  
咳嗽發熱飲食日少月經先期作肝脾鬱怒而血燥

前藥復傷而益甚先用四君子芎歸山梔丹皮飲食  
漸進服月餘而嗽止又以加味逍遙散加鈎藤二十  
餘劑而眉不動乃去鈎藤倍加參朮當歸月餘瘡結  
靨又以八珍湯加山梔丹皮而痊

一婦人患前症膿水淋漓發熱作渴體倦惡寒經水不  
利久而不愈此肝脾虧損而虛熱也先用補中益氣  
湯加山梔川芎而元氣漸復又用逍遙散而瘡漸愈  
又虛後患疥遍身作痒搔起疣瘡破而出膿或出血

水誤服醉仙散殊類風症用八珍湯數劑而安又用十全大補湯患處漸乾矣

一婦人日晡身痒素清苦因于鬱怒遍身晡熱內熱自汗盜汗月經不行口乾咽燥用歸脾湯數劑諸症稍退後兼加味逍遙五十餘劑而痊

一婦人瘙痒發熱日晡益甚皮膚赤暈月經過期此血虛而有熱也以逍遙散倍加熟地熱止痒退更以四物加柴胡參芪炙草茯苓調理而愈

一婦人懷抱久鬱患前症膿水淋漓服連翹消毒散食少胸痞服清氣化痰丸作嘔吐痰服清熱化痰丸煩熱畏寒四肢煖熱面目赤色脉大而無力此脾胃虧損而虛寒隔陽氣于外遂用六君子湯加炮薑治之諸症少愈飲食頓進又佐以四物湯諸症漸愈又以四君子每味各一錢四物湯每味各五分諸症全愈一婦人每秋間兩手心作痒搔起白屑因勞役惱怒則發寒熱遍身作痒起疔瘡或以為風症內服花蛇等



藥外敷硫黃之類又服遇仙丹熱渴益甚月水不通  
謂脾肝二經血燥生風先用加味逍遙散熱渴漸減  
又用八珍柴胡山梔患處少可後因怒氣發熱脇痛  
患處焮腫用加味逍遙散四劑而安又用四君芎歸  
山梔丹皮至半載而痊

一男子遍身癢痒諸藥不效脉浮按之而瀋以生血藥  
為主間以益氣百貼而愈

宋生遍身作痒搔破成瘡出水脉浮數此手足陽明經

風熱所致以人參敗毒散對四物湯加苓連服之外  
以松香一兩枯礬五錢輕粉三錢為末麻油調數月  
餘而愈又一人患此但脉沉實以前藥加大黃治之  
漸愈再服人參敗毒散而平



續名醫類案卷五十七